



## UPM sukar digugat di VTF 2023

Oleh **Mohd Rafi Mamat** - Mei 28, 2023 @ 4:37pm  
[bhsukan@bh.com.my](mailto:bhsukan@bh.com.my)



Atlet Universiti Putra Malaysia (UPM) muncul juara acara 4x400m campuran pada Kejuhan Varsity Track & Field (VTF) 2023 Sirkit Kedua di Stadium Darul Makmur. NSTP/  
Mohd Rafi Mamat

KUANTAN: Kontinjen Universiti Putra Malaysia (UPM) mengungguli kutipan pingat dalam kalangan 29 pasukan yang bertanding pada Kejuhan Varsity Track & Field (VTF) 2023 Sirkit Kedua di Stadium Darul Makmur, di sini.

Membariskan ramai atlet kebangsaan dan negeri, mereka kini mengumpul 18 pingat emas, sembilan perak dan lima gangsa meninggalkan jauh Universiti Pendidikan Sultan Idris (UPSI) di tempat kedua yang mengumpul empat emas, dua perak dan tujuh gangsa.

Universiti Teknologi MARA (UiTM) di tempat ketiga mendapat satu emas, tiga perak dan lima gangsa.

Sebelum tirai kejohanan ditutup, UPM yang juga juara VTF 2023 Sirkuit Pertama di Melaka, dijangka mampu menuai lagi beberapa butir pingat emas menerusi atlet berpengalaman mereka yang beraksi di peringkat akhir.

Bagi Mandy Goh Li, dia amat berbangga apabila berjaya menyumbang tiga pingat emas untuk kontinjen UPM menerusi acara 400 meter (m) berpagar, 4x400m wanita dan 4x400m campuran.

Menurutnya, pencapaian tiga pingat emas pada kejohanan VTF Sirkuit Kedua ini sama yang dilakukan pada VTF 2023 Sirkuit Pertama di Melaka sebelum ini.

"Pengalaman luas atlet menjadi antara faktor utama kontinjen UPM terus cemerlang pada saingan sukan di peringkat institusi pendidikan tinggi (IPT) di negara ini.

"Saya berharap kontinjen UPM dapat muncul juara pada VTF 2023 Sirkuit Kedua zon timur di Kuantan kali ini sebelum beraksi pada Sirkuit Ketiga zon utara (VTF3) di Stadium Batu Kawan Pulau Pinang dan Grand Final pada Oktober di UPSI," katanya, di sini semalam.

Bagi atlet kebangsaan, Nor Sarah Adi yang terlepas mewakili UPM pada VTF Sirkuit Kedua kali ini berikutan kecederaan buku lali kanan.

"Saya datang ke Kuantan untuk memberi sokongan kepada rakan yang bertanding dalam memastikan pencapaian selaku juara VTF Sirkuit Pertama dapat terus dikekalkan.

"Pada VTF Sirkuit Pertama di Melaka saya menyumbang dua pingat emas untuk UPM dalam acara 100m dan 4x100m serta gangsa dalam acara lompat pagar," katanya yang berasal dari Felda Jengka Tiga, Maran.

Kejohanan kali ini menyaksikan dua rekod baharu kejohanan dilakukan menerusi acara 400 meter lari berpagar (lelaki) dan 5,000 m (wanita).